
Юксак эътироф эзгу мақсадларга қанот

Хабарингиз бор, мамлакатимиз мустақиллигини мустаҳкамлаш, унинг иқтисодий қудратини юксалтириш ва ислохотларни муваффақиятли амалга ошириш борасидаги катта хизматлари, сўнги йилларда юртимизда барча соҳаларда қўлга киритилаётган улкан ютуқларга қўшган муносиб ҳиссаси, Ватанимиз тараққиёти ва халқимиз фаровонлигини таъминлаш, ишлаб чиқариш соҳа ва тармоқларини замон талаблари асосида такомиллаштириш, илғор инновацион технологияларни жорий этиш борасидаги кўп йиллик самарали ва фидокорона меҳнати, жамиятимизда миллатлараро дўстлик ва тотувликни мустаҳкамлаш, ёш авлодни ватанпарварлик ва истиқлол ғояларига садоқат руҳида тарбиялашдаги фаол иштироки учун бир гуруҳ юртдошларимиз Президентимиз Фармонида асосан тақдирланганлар сафида вилоятимиз вакиллари ҳам бор.

Вилоят тадбиркорлар маркази катта мажлислар залида мукофотланган юртдошларимизни тақдирлашга бағишланган тадбир бўлиб ўтди.

Тадбирда вилоят ҳокими, Ўзбекистон Республикаси Олий Мажлиси Сенати аъзоси Шухрат Ғаниев сўзга чиқди ва йиғилганларни энг улуғ, энг азиз байрам билан муборакбод этди.

Тадбирда Президентимизнинг Ўзбекистон Республикаси давлат мустақиллигининг йигирма етти йиллиги муносабати билан фан, таълим, соғлиқни сақлаш, адабиёт, маданият, санъат, маънавият ва маърифат ҳамда ижтимоий соҳалар ходимларидан бир гуруҳини мукофотлаш тўғрисидаги Фармонида асосан мукофотланган ҳамюртларимиз номи эълон қилинди.

Тақдирланганларга давлатимизнинг юксак унвон ва мукофотларини вилоят ҳокими Ш.Ғаниев тантанали топширди.

– Бу йил менинг ҳаётимда унутилмас лаҳзаларга бой бўлмоқда. Аввало, Президентимизнинг июнь ойида корхонамизга ташриф буюргани жамоамиз учун жуда аҳамиятли воқеа бўлиб қолади. Бу таассуротларни ҳали унутганим йўқ, – дейди «Меҳнат шухрати» ордени соҳибаси, Марғилон шаҳридаги «Наримтекс» қўшма корхонаси директори Наргизахон Аминова. – Эндиликда эса давлатимизнинг юксак мукофотида сазовор бўлганимдан чексиз ҳаяжондаман. Бу эътирофлар келгуси мақсадларимизга қанот бўлади. Экспорт борасидаги ташаббусларимизни янада кенгайтириш орқали фаолиятимизни ривожлантириб, бу ишончни оқлаймиз.

– Муҳтарам Юртбошимиз кичик меҳнатларимизни жасорат деб баҳолади. Шунинг ўзи ҳам инсони азиз юртда яшаётганимиздан далолатдир, – дейди «Жасорат» медали соҳибаси, Ёзёвон туманидаги хунарманд-тикувчи Нодирахон Ахмадалиева. – Ўн тўрт йилдан бери хунармандчилик билан шуғулланаман. Биз тадбиркорларга яратилган имкониятлардан кенг фойдаланиб, ютуқларга эришяпмиз. Бу нафақат менга, балки менинг ёнимда турган шогирдларим ва, яқинларимга берилган мукофотдир.

Юксак мукофот эгалари сафида навқирон авлод вакиллариининг борлиги ҳам диққатга сазовордир. Улардан бири, Қува туман кўп тармоқли марказий поликлиника умумий амалиёт шифокори Жавоҳир Солиев мамлакатимизда таъсис этилиб, илк маротаба топширилган “Келажак бунёдкори” медали билан тақдирланди:

– Мустақиллигимизнинг 27 йиллик айёми менинг ҳаётимда унутилмас бўлиб муҳрланади. Президентимиз меҳнатларимни юксак мукофотга лойиқ топганидан фахрланиб, олдимга улкан мақсадларни қўйдим. Келажакда халқимиз саломатлигини асраш, тиббиётимизни ривожлантириш йўлида бор куч-қудратимни ишга соламан.

Тақдирлаш маросимида санъат усталари томонидан куй-қўшиқлар ижро этилди.

Мадаминжон СОЛИЖОНОВ.

Шерзод ҚОРАБОЕВ олган сурат.